

KODI KULTUROR QË MBART DHE PËRCJELL VEPRA E NAIM FRASHËRIT

Etjona HOXHA

PERLA – Revistë shkencore – Kulturore tremujore

Viti XI 2006 Nr. 3 (42) fq. 15-20

Botuesi: Fondacioni Kulturor “Saadi Shirazi” – Tiranë

Ardhja e Naim Frashërit dhe e veprës së tij në letërsinë shqiptare do të përkonte me një moment tronditës historik nëpër të cilin po kalonte populli shqiptar. Pikërisht këtu do të zërë fill edhe një nga periudhat letrare më të rëndësishme të historisë së letërsisë shqiptare, Rilindja kombëtare. E konceptuar jo vetëm si lëvizje popullore për çlirim kombëtar, por edhe si lëvizje për arsimim masiv, për përhapje të diturisë dhe për emancipim kulturor. Kjo ishte koha kur mendimtarët dhe autorët shqiptarë fillojnë të luajnë një rol të rëndësishëm në zgjimin e ndërgjegjes kombëtare, në luftën kundër pushtuesit të huaj, për të larguar errësirën e paditurinë dhe për të përhapur kudo “dritën dhe mirësitë”

E në këtë kapërcyell epokash mendimtari e poeti, që do të linte gjurmë të pashlyeshme në historinë e letërsisë shqiptare, do të ishte pikërisht Naim Frashërit. Vepra letrare e tij që edhe sot arrin t’i flasë po aq ëmbël “shqip” botës shqiptare u mbrujt brenda një kodi kulturor të mirëpërcaktuar (si nga iluminizmi francez e racionalizmi i Dekartit, nga letërsia orientale e në veçanti ajo persiane, filozofia bektashiane etj.). Por si është konceptuar dhe strukturuar ky kod kulturor që mbart dhe përcjell vepra e Naim Frashërit?

Në fakt termi “kulturë”, brenda një konceptimi sociologjik, shihet si një arritje (fitore) e njerëzimit mbi dukuritë e errëta të shoqërisë. Si rrjedhojë për shoqërinë njerëzore, është fakt tërësisht i njohur mirëpërcaktimi i jetës fiziologjike dhe sociale të saj. Në qoftë se do t’i referohemi një formulimi më të saktë kur flasim për kulturë, flasim për një ndryshim gradual të një bashkësie shoqërore. Thënë ndryshe termi “kulturë” nënkupton një realizim konkret të potencialit njerëzor¹. Pavarësisht ekzistencës së përkufizimeve të ndryshme mbi termin kulturë janë evidentuar disa elemente të qëndrueshme, të cilat etiketohen si “konstante ndërkulturore”, përcaktuese të shkallës së zhvillimit kulturor të një kombi.

a. Një ndër konstantet përcaktuese të kodit kulturor naimian do të jetë vëmendja dhe rëndësia për krijimin e një forme organizimi shoqëror që nënkupton një klan, një tribu dhe në rastin tonë një **komb**. Është e njohur lidhja shpirtërore dhe e pandashme e poetit tonë me atdheun : “ Shumë kombe janë shuar, por shqiptarët kanë patur uratën e Zotit që mbenë, e kombi ynë s’ka rënë poshtë.” Me këtë gjuhë zemre ka shkruar Naimi për kombin tonë. Vepra letrare e Naim Frashërit erdhi si pjesë ose si hallkë e një letërsie të angazhuar. Poezia naimiane do të orientohet kështu kah motivit atdhetar e patriotik. “Rilindja dhe forcimi i kombit shqiptar ishte ngushtësisht e lidhur me konceptin e njeriut të lirë e të qytetëruar.”² Riorganizimi i kombit shqiptar do të ishte rrjedhojë e lënies

¹ Departament of World Mission and Evangelism, *Culture and Gospel*, International Review of Mission, 1985, fq.79.

² Jorgo Buló, *Tipologjia e lirikës naimiane*, Tiranë, 1999.

mënjatë të epokës obskurantiste, të pushtetit absolut të fesë dhe pushtuesit të huaj. Këto përbënin teorikisht disa nga qëllimet finale të propaganduar nga iluminizmi francez me përfaqësues Didëroin, Volterin, Ruson etj. Ide të cilat Naimi i bëri pjesë të kodit kulturor të tij dhe i vuri në funksion të ideve atdhetare. Në vargjet “Jepi shqiptarit dritë/ zot i vërtetë të shohi/ të marrë vesh mirësitë / Të vërtetën ta njohë” Në mënyrë eksplicite shohim të shpalosura idetë iluministe dhe angazhimin tërësor të poetit për realizimin e idealeve kombëtare. Ai ishte një ndër mendimtarët që së bashku me poetët e tjerë të Rilindjes Kombëtare e shihnin përhapjen e arsimit, të dritës, e të kulturës si hallkë kryesore për çlirim e përparim kombëtar.

b. Një bashkësi shoqërore është mbartëse e një kulture të caktuar në qoftë se ajo identifikohet me anën e një kodi ose të një sistemi komunikimi që nënkupton **gjuhën**.”Për disa qytetërime, theksojnë njohës të shquar të trashëgimit kulturor lindor, gjuha është mjeti më i rëndësishëm i vazhdimit dhe i ruajtjes së kulturës”³. Në veprën e poetit tonë të madh dashuria për atdheun e shtrenjtë dhe përcimi i idealeve kombëtare nuk do të shprehen vetëm nëpërmjet evokimit të motit të madh të Skënderbeut. Pikërisht, gjuha do të përbëjë një nga konstantet ndërkulturore kyç në krijimtarinë letrare të Naim Frashërit. Në veprën e poetit tonë të madh vendosen ura të forta lidhëse mes tij dhe dashurisë për gjuhën, si shprehje e ekzistencës, e konsolidimit dhe e emancipimit kulturor të kombit shqiptar . Duke lexuar vargun naimian mund të pohohet fakti që Naim Frashërit i ka kushtuar një vend të konsiderueshëm dashurisë për gjuhën amtare kryesisht te “Gjuha jonë”, “Gjuha shqipe”, “Korça” etj. Flasim për vargje të cilat gati-gati e himnizojnë atë duke e konsideruar shkrimin a lëvrimin e saj si të vetmen mundësi për ndritjen, ndriçimin e mendjes dhe arsyes së shqiptarëve. Edhe pse njohës i persishtes , turqishtes, arabishtes, greqishtes e frëngjishtes, për Naimin gjuha shqipe mbetej e vetmja gjuhë që përshkohej nga drita sepse e shihte si element që do të zbulonte, lulëzonte e vëllazëronte kombin.

c. Nuk ka sesi të konceptohet piramida e elementeve të kodit kulturor naimian pa konceptin e **së shenjtës**, e asaj që shtrihet më tej se jeta e përditshme.

Në fakt është e qartë që në veprën e Naim Frashërit, religjioni shërben si burim frymëzimi dhe meditimi. Do të jenë sekti bektashian dhe filozofia sufite, ndikueset kryesore në lirikën naimiane. Sipas këtyre të fundit, kudo ndihet prania e Zotit, i cili i jep jetë gjithësisë,dhe është pikërisht dashuria e Zotit që vë këtë gjithësi në lëvizje. Brenda këtij konceptimi, Naimi në raportin krijues\ krijesë, nuk sheh gjë tjetër veç një raporti të fortë mes forcës hyjnore (Zoti) – dhe shfaqjes më të përsosur të kësaj force, (njeriu). Teksa përmendet “koncepti panteist i Naimit” i ndikuar këtu edhe nga bektashizmi, natyrshëm në mendje të krijohet kundërvënia mes dogmës ortodoksale të islamizmit dhe dogmës ortodoksale të kristianizmit. E para që lidhet me konceptin filozofik të imanencës (shkrirja e krijuesit me natyrën dhe gjithësinë) dhe trashëndencës (njeriu konceptohet si shëmbëlltyrë e Zotit, por jo Zoti vetë). Pra ajo që vlen të theksohet në veprën e Naimit, kodi informativ (filozofia sufite, feja bektashiane) vihet kështu në funksion të kodit estetik të veprës së poetit tonë të madh.

d. Për të shprehur jo vetëm besimin në të ardhmen,por edhe një shkallë të lartë të zhvillimit kulturor të kësaj bashkësie,vihen në funksionim forma të ndryshme të artit.

Në fakt, Naimi zgjodhi **letërsinë** për të ndërtuar më vonë një kod të tijin poetik dhe etik. Letërsia në periudhën e Rilindjes Kombëtare u dallua për karakterin e saj misionar,

³ Gazmend Shpuza, *Bota iraniane në veprën e Sami Frashërit*, Tiranë 2004.

për zgjimin e ndërgjegjes kombëtare, për të përhapur dritën dhe diturinë në kombin shqiptar.

Në qendër të kodit etik të Naimit qëndron **njeriu etik**, që për poetin tonë identifikohet me patriotin, me njeriun e mbujtur me dashurinë për atdheun dhe dëshirën për çlirim kombëtar. Por thelbi i etikës së tij qëndron në faktin që kategori të tilla estetike si: e bukura, e shëmtuara, e mira, e keqja etj, gjallojnë te njeriu.” Edhe ëngjëlli, edhe djalli/ janë brenda te i gjalli,”- thotë poeti që si rrugë të vetme shpëtimi sheh identifikimin e njeriut me Zotin.

Megjithatë në krijimtarinë e tij, kategoria estetike e **së bukurës**, e pandashme nga koncepti panteist, duket të jetë mbizotëruese.

E bukur

Gjithësia

Atdheu

Vasha

Motivi filozofik

Motivi patriotik

Motivi erotik

Te gjithësia ai sheh madhështinë, hijeshinë dhe bukurinë e krijuesit të shkrirë në gjithçka që të kap syri: “*Kudo është bukurija\ Në qiej, në dhe, në hënë... po këtu është e tërë\ Dhe ajo ti është bërë.*”

Por burimi i së bukurës dhe i së mirës mbetet edhe natyra shqiptare sepse mbi të gjitha, ai aty sheh të shkrirë zotin: “*Sa është e bukur faq’ e dheut! S’të zë syri gjë të metë\ Gjithë kjo bukuri vallë nga dheu të ketë mbleruar\ A me të matht të tij Zoti prej parrajs’ e ka dërguar?*”

Përveç natyrës, një trajtë të përsosur të bukurisë ai e sheh edhe te vasha shqiptare, figura e së cilës, në vargun naimian, nuk njihet plakje kurrë. Bukuria femërore për poetin është shprehja më perfekte e bukurisë së Zotit: “*Zot i vërtetë\ Ke mbledhur dritën, Diellin, ditën\ Ndë gjithë jetë\ Edh’ e ka bërë\ Gush’ e krahuar\ Faqez e ballë\ Dhe’ pulp e llërë.*”

U përpoqëm të jepnim, kështu ,në një vështrim panoramik, elementet kryesore që sendërtojnë kodin kulturor që mbart vargu naimian. U prekën konstante ndërkulturore, të tilla si: ekzistenca e një kombi të lirë dhe të unifikuar, krijimi dhe të pasurit e një kodi ose sistemi komunikimi, të tillë si gjuha, koncepti i së shenjtës që vjen e mbartur te Naimi nga sektet bektashian dhe filozofia sufite. Dhe të gjitha këto morën jetë në një prej formave më të bukura të artit, të letërsisë.

Së fundmi,Naimi bën pjesë ndër ata personalitete që Bergsoni, në veprën e tij “Dy burimet e moralit dhe të fesë”, i quan “moral i hapur”.

Njerëz që përtej tabuve, paragjyqimeve e problemeve sociale të kohës, rigjejnë vrullin krijues të jetës, mistikën, dashurinë e shenjtërinë, në të njëjtën mënyrë si Krishti që i zbuloi njerëzimit vlerën e bamirësisë dhe të vetësakrifikimit në emër të humanizmit.

Bibliografia

Departament of World Mission and Evangelism, *Culture and Gospel*, 1985.

Jorgo Bullo Tipologjia e lirikës naimiane, Tiranë, 1999.
Gazmend Shpuza, *Bota iraniane në veprën e Sami Frashërit*, Tiranë, 2004.
Jorgo Bullo, “Ëndërrimet poetike të Naim Frashërit” ne Tehajjulat. Tiranë 2005.
Didie Zhylje, Fjalori i filozofisë , Tiranë 1994.
Naim Frashëri, Vepra Letrare (I-V) Tiranë 1995.
Rexhep Qosja, Panteoni i rralluar, Tiranë 1988.
Rexhep Qosja, Porosia e Madhe, Tiranë, 1989.